

Ekolozi okupljeni u Eko BiH mreži poručuju da zahtjevaju hitnu reakciju od strane nadležnih institucija Bosne i Hercegovine povodom odluke Ministarstva zaštite okoline i energetike Hrvatske da se na lokaciji bivšeg vojnog skladišta Čerkezovac na Trgovskoj gori u Opštini Dvor ipak zbrinjava nuklearni otpad. Ova odluka je poražavajuća i za svaku osudu poručuju ekolozi.

Ova lokacija data je na upotrebu Fondu za finansiranje razgradnje i zbrinjavanja radioaktivnog otpada, nuklearne elektrane (NE) Krško, uprkos dugogodišnjem apelu građana BiH, kao i mještana Hrvatske da se pronađe drugo mjesto za zbrinjavanje ovog, veoma opasnog otpada, s obzirom da bi mogao ugroziti više od 250.000 ljudi, koji žive uz sliv rijeke Une.

“U jeku pandemije COVID 19, koja je svakog od nas paralisala na svoj način, kada strepimo za zdravlje najdražih, u vrijeme zatvorenih granica i zabrana okupljanja, nadležni iz Republike Hrvatske na jako ružan način zloupotrebljavaju aktuelnu situaciju, sada gdje se očekuje povećan stepen solidarnosti, saradnje i razumijevanja”, poručuju iz nevladine organizacije Green Team iz Novog Grada.

NVO „Green team“, kao naročito aktivni akter u borbi protiv odlaganja radioaktivnog otpada NE “Krško,” na Trgovskoj gori, 27. septembra 2019. godine, uspješno je organizovala mirne proteste, u Novom Gradu, koji su okupili više od 2000 građana, s ciljem da se skrene pažnja nadležnih domaćih i inostranih institucija na ozbiljnost ovog problema.

Protest su podržali stanovnici iz 19 lokalnih zajednica iz BiH i Hrvatske (Velika Kladuša, Bihać, Bosanski Petrovac, Bosanska Krupa, Bužim, Cazin, Sanski Most, Krupa na Uni, Prijedor, Kostajnica, Kozarska Dubica, Tuzla, Zenica, Lukavac i Dvor, Majur, Petrinja, Sisak).

“Ne nuklearnom otpadu uz granicu sa Bosnom i Hercegovinom!” jasno su poručili i iz organizacije “Climate Save Bosnia” uz podršku Aarhus centra u BiH i 17 nevladinih organizacija za zaštitu okoline/životne sredine koje su dio Eko BiH mreže, ispred Ambasade Republike Hrvatske u Sarajevu, 29. jula prošle godine. Tada je uručeno i protestno pismo ambasadoru Republike Hrvatske, koje je dostavljeno i nadležnim institucijama u BiH. Emina Veljović, izvršna direktorica Aarhus centra u BiH ističe da je potpuno neshvatljivo da se ova lokacija godinama razmatrala kao adekvatno rješenje, uprkos činjenicama i dokazima koji upućuju na suprotno.

“U svojim navodima u protestnom pismu, jasno smo napomenuli da odabrana lokacija nije samo potpuni promašaj, što se tiče budućeg uticaja na zdravlje građana i okoline, već i da je ozbiljan sigurnosni problem, jer se radi o veoma trusnom području, a što se moglo i potvrditi

tokom nedavnog, snažnog zemljotresa koji je pogodio Hrvatsku. Zatraženo je i da se ispoštuju sve zakonske obaveze, naročito one koje proizilaze iz Aarhuske konvencije i ESPOO konvencije o prekograničnom uticaju na životnu sredinu, a koje se, kako smo u više navrata naglasili ne poštuju. Iz tog razloga, ova odluka Ministarstva zaštite okoline i energetike Hrvatske, koja u svom nazivu ima riječi „zaštite okoline“ je zaista poražavajuća”, navela je Veljovićeva, saopštio je Centar za životnu sredinu.

Izvor: capital.ba